

# Der Kas

I hob an Termin und i bin scho spat dro  
und am *Mittleren Ring* is Stau

I kriag voi die Panik und suach ma an Schleichweg  
und moan, i bin super-schlau

Doch genauso schlau san a die ander'n Zehntausend  
und jetz steh ma da im Schleichweg drin

I komm nimma vor und i komm nimma z'ruck  
aber aufreg'n hat eh koan Sinn

Wei...

**Jetz is der Kas scho biss'n - jetz is er nimma frisch  
Jetz is der Kas scho biss'n – jetz liegt er aufm Tisch  
Machst du amoi an Fehler – setz di ned unter Druck  
Du hast an Bledsinn g'macht – und die ganze Welt lacht  
Doch bleib cool – es gibt eh koa Z'ruck**

I steh auf der Party und laber scho ewig  
mit einer mir fremden Frau

Und i verzähl, was mei Chef für a Arschloch is  
und a total perverse Sau

Doch auf oamoi, da sagt die Dame zu mir:  
„Oiso, i seh des ned ganz a so“

„Ihr Chef mag vielleicht a bled's Arschloch sei  
doch nebenbei is er a no mei Mo“

O...

## Refrain

Du bist so berühmt und so reich wie a Scheich  
und muasst oiwei der Größte sei

Und du lad'st dir die scheenst'n Frau'n vo der Welt  
auf dei Luxus-Segelyacht ei

Und du zoagst eahna: Du bist der Groß-Kapitän  
- wirfst den Anker lässig über Bord

Doch am Anker war leider koa Kett'n dro  
und der Anker, der is jetz fort

O...

Refrain

I fahr in der Nacht mit meim Auto nach Haus  
vom *Andechser* hinterm Dom

Da steht eine Schönheit am Straßenrand  
und wedelt mit am Kondom

I steig voi in d' Brems'n und ruaf: „Hello Baby!“  
Doch sie is vo der Polizei

Sie hoit ma's Kondom unter d' Nas'n und sagt:  
„Mei Herr, jetzt blas'n s' bittschee da nei!“

Mei...

Refrain

A jeder macht Fehler – a jeder baut Scheiss  
und merkt hinterher: Jetz is z'spat

Drum sei gnädig, wenn oana sein Fehler ei'siagt  
und spar dir dein guad'n Rat

Und fahrt dei Frau in d' Garag'n nei  
und du hearst nur an sauber'n Krach

Dann woäßt du: Es ko nur dei *Mountainbike* sei  
- des war no drob'n aufm Autodach

Na...

Refrain